



REPUBLIKA E SHQIPËRISË

KUVENDI I REPUBLIKËS SË SHQIPËRISË

PROJEKTLIGJ

Nr._____, datë_____._____2023

PËR

**DISA SHTESA DHE NDRYSHIME NË LIGJIN NR. 65/2014,
“PËR AGJENCINË E INTELIGJENCËS DHE SIGURISË SË MBROJTJES”**

Në mbështetje të neneve 78 dhe 83, pika 1, të Kushtetutës së Republikës së Shqipërisë, me propozim të Këshillit të Ministrave,

KUVENDI
I REPUBLIKËS SË SHQIPËRISË

V E N D O S I:

Në ligjin nr. **65/2014** “Për Agjencinë e Inteligjencës dhe Sigurisë së Mbrojtjes, bëhen këto shtesa dhe ndryshime:

Neni 1

Në nenin 4 të ligjit 65/2014, pikat 8, 9, 10, 11, 13, 14, 15 shfuqizohen.

Neni 2

Neni 7, ndryshon si më poshtë:

Agjencia e Inteligjencës dhe Sigurisë së Mbrojtjes kryen këto detyra:

a) përpunon kërkesat strategjike vjetore për inteligjencë;

- b) paraqet, produkt inteligjence të nivelit strategjik dhe operacional për autoritetet e drejtim - komandimit të Forcave të Armatosura, në përputhje me parimin “nevojë për njohje”; informon Presidentin dhe Kryeministrin nëpërmjet Ministrit të Mbrojtjes;
- c) grumbullon dhe shpërndan të dhëna e informacione, si dhe paraqet produkt inteligjence në funksion të sigurisë së Ministrisë së Mbrojtjes dhe Forcave të Armatosura nga kërcënimet që mund t'i vijnë asaj nga aktorë shtetërorë dhe jo shtetërorë që ndodhen dhe kryejnë veprimtarinë e vet në zonën përgjegjësisë dhe interesit të AISM;
- ç) përgatit dhe paraqet produkt inteligjence, lidhur me kërcënime të natyrës së terrorizmit, ekstremizmit, spiunazhit, sabotazhit, diversionit, subversionit, armëve të shkatërrimit në masë, kërcënimeve kibernetike e krimit të organizuar ndaj kapaciteteve mbrojtëse të vendit;
- d) kryen veprimtari mbështetëse tekniko- administrative, sipas nevojave të saj;
- dh) merr pjesë në procedurat për pajisjen me “certifikatë sigurie” të personelit ushtarak dhe civil të Ministrisë së Mbrojtjes, të Forcave të Armatosura dhe “certifikatë sigurie industriale” të subjekteve që kërkojnë të hyjnë në marrëdhënie me to;
- e) shkëmben produkt inteligjence, bashkëpunon dhe kryen operacione të përbashkëta me struktura të inteligjencës së NATO-s dhe BE-së, me shërbime dhe me agjenci të inteligjencës së vendeve anëtare të NATO-s e të BE-së dhe agjencitë partnere në interes të mbrojtjes kolektive;
- ë) kontribuon me personel, në përmbushje të detyrimeve që rrjedhin nga anëtarësimi në NATO, BE, OKB dhe në çdo organizëm tjetër ndërkombëtar ku shteti shqiptar është ose synon të bëhet palë;
- f) garanton sigurinë e veprimtarisë së vet, të personelit, të informacionit, infrastrukturës dhe të sistemeve të komunikimit, shkëmbimit, transmetimit të informacionit të klasifikuar “sekret shtetëror” ose të NATO-s;
- g) organizon dhe kryen arsimim dhe trajnim profesional për punonjësit e strukturave të inteligjencës ushtarake, në kuadër të sistemit arsimor të Ministrisë së Mbrojtjes, të NATO-s dhe në kuadër të bashkëpunimit me shërbimet homologe dhe partnere;
- gj) kryen detyra të tjera brenda misionit të saj, të përcaktuara në rregulloren e funksionimit të kësaj Agjencie;
- h) në zbatim të shkronjave “c”, “ç”, “dh” dhe “e”, Ministri i Mbrojtjes miraton rregullore me propozimin e drejtorit të Përgjithshëm të kësaj Agjencie.

Neni 3

Në nenin 8, pika “3”, shkronja “f”, togfjalëshi “dhe të shefit të Shtabit të Përgjithshëm të Forcave të Armatosura” shfuqizohet.

Neni 4

Neni 9, ndryshon si më poshtë:

1. *Drejtori i Përgjithshëm i Agjencisë së Inteligjencës dhe Sigurisë së Mbrojtjes është autoriteti më i lartë drejtues dhe përgjegjës për veprimtarinë e institucionit.*
2. *Drejtori i Përgjithshëm i Agjencisë së Inteligjencës dhe Sigurisë së Mbrojtjes këshillon ministrin e Mbrojtjes dhe shefin e Shtabit të Përgjithshëm të Forcave të Armatosura për çështje të zbulimit, kundërzbulimit dhe sigurisë së mbrojtjes.*
3. *Drejtori i Përgjithshëm i Agjencisë së Inteligjencës dhe Sigurisë së Mbrojtjes është ushtarak aktiv.*
4. *Drejtori i Përgjithshëm i Agjencisë së Inteligjencës dhe Sigurisë së Mbrojtjes emërohet, lirohet ose shkarkohet nga Kryeministri me propozim të Ministrit të Mbrojtjes.*
5. *Drejtori i Përgjithshëm i Agjencisë së Inteligjencës dhe Sigurisë së Mbrojtjes është autoriteti që përfaqëson strukturat e inteligjencës ushtarake shqiptare në marrëdhëniet me institucionet brenda vendit, NATO-n, BE-në dhe organizmat e tjerë ndërkombëtarë.*
6. *Drejtori i Përgjithshëm i Agjencisë së Inteligjencës dhe Sigurisë së Mbrojtjes ka këto detyra dhe përgjegjësi:*
 - a) *drejton, organizon dhe menaxhon veprimtarinë e Agjencisë së Inteligjencës dhe Sigurisë së Mbrojtjes, në përputhje me Kushtetutën e Republikës së Shqipërisë dhe legjislacionin në fuqi.*
 - b) *siguron zbatimin e ligjshmërisë për veprimtarinë e Agjencisë së Inteligjencës dhe Sigurisë së Mbrojtjes në realizimin e detyrave dhe përgjegjësi.*
 - c) *raporton te ministri i Mbrojtjes për veprimtarinë e Agjencisë së Inteligjencës dhe Sigurisë së Mbrojtjes.*
 - ç) *i propozon ministrit të Mbrojtjes tabelën e organizimit dhe pajisjeve të Agjencisë së Inteligjencës dhe Sigurisë së Mbrojtjes.*
 - d) *emëron, liron ose shkarkon nga detyra, komandon punonjësën ushtarak nënoficer dhe ushtar dhe punonjësën civil, ekuivalent me punonjësën ushtarak, nënoficer dhe ushtar, sipas tabelës së organizimit dhe pajisjeve të Agjencisë së Inteligjencës dhe Sigurisë së Mbrojtjes.*
 - e) *nënshkruan marrëveshjet e bashkëpunimit dy ose shumëpalëshe me strukturat e inteligjencës brenda dhe jashtë vendit, me miratimin e ministrit të Mbrojtjes.*
 - ë) *nxjerr urdhra dhe udhëzime të karakterit ushtarako-administrativ brenda kompetencave të tij.*
 - f) *kryen detyra të tjera, të përcaktuara në akte të tjera ligjore e nënligjore.*

Neni 5

Neni 10, shfuqizohet.

Neni 6

Në nenin 11, pika “a”, ndryshon si më poshtë:

“të ketë eksperiencë pune në pozicione drejtuese në struktura të inteligjencës ushtarake, ose Shtabin e Përgjithshëm të Forcave të Armatosura, Komandat e Forcave, përfaqësitë apo shtabet e NATO-s”.

Neni 7

Neni 12, ndryshon si më poshtë:

“Zëvendës drejtori i Përgjithshëm të Agjencisë së Inteligjencës dhe Sigurisë së Mbrojtjes”

- 1. Zëvendës drejtori i Përgjithshëm të Agjencisë së Inteligjencës dhe Sigurisë së Mbrojtjes është civil.*
- 2. Zëvendës drejtori i Përgjithshëm të Agjencisë së Inteligjencës dhe Sigurisë së Mbrojtjes emërohet, lirohet ose shkarkohet nga detyra nga ministri i Mbrojtjes me propozim të drejtorit të Përgjithshëm të Agjencisë së Sigurisë së Mbrojtjes.*
- 3. Në rast të mungesës së drejtorit të Përgjithshëm, ai zëvendësohet nga zëvendës drejtori i Përgjithshëm.*

Neni 8

Në nenin 13, pika “a”, ndryshon si më poshtë:

“të ketë shërbyer për një periudhë jo më pak se 15 vjet në struktura të inteligjencës ushtarake ose civile apo në institucione me natyrë të ngjashme me to”.

Neni 9

Në nenin 16, pika “1”, ndryshon si më poshtë:

“Agjencia e Inteligjencës dhe Sigurisë së Mbrojtjes krijon qendra inteligjence që funksionojnë jashtë vendit në mënyrë të përkohshme, në zona përgjegjësie dhe zona interesi në mbështetje të Forcave të Armatosura”.

Neni 10

Neni 17, ndryshon si më poshtë:

“Burimet dhe grumbullimi i informacionit”

- 1. Agjencia e Inteligjencës dhe Sigurisë së Mbrojtjes, në përmbushje të misionit të saj, përdor dhe shfrytëzon për grumbullim informacioni të gjithë disiplinat e inteligjencës.*

2. *Agjencia e Inteligjencës dhe Sigurisë së Mbrojtjes, në përmbushje të misionit të saj, përdor dhe shfrytëzon për grumbullim informacioni sisteme apo baza të dhënash në nivel kombëtar dhe ndërkombëtar.*
3. *Të dhënat e përftuara nga sistemet apo bazat e të dhënave, të mbledhura për qëllimet e këtij ligji, administrohen dhe përdoren vetëm për këtë qëllim, në përputhje me dispozitat e ligjit për mbrojtjen e të dhënave personale.*
4. *Burimet sinjalore të Agjencisë së Inteligjencës dhe Sigurisë së Mbrojtjes grumbullojnë informacion vetëm me natyrë zbulimi jashtë vendit.*
5. *Procedurat specifike për grumbullimin e informacionit miratohen me rregullore të përbashkët të ministrit të Mbrojtjes dhe titullarëve të institucioneve përkatëse sipas përcaktimeve të legjislacionit në fuqi.*

Neni 11

Neni 18 shfuqizohet.

Neni 12

Neni 21 ndryshon si më poshtë:

“Ndalimi i veprimtarisë jashtë misionit”

1. *Agjencisë së Inteligjencës dhe Sigurisë së Mbrojtjes i ndalohet të kryejë veprimtari të karakterit policor.*
2. *Agjencisë së Inteligjencës dhe Sigurisë së Mbrojtjes i ndalohet të kryejë veprime për të realizuar qëllime e objektiva që nuk kanë lidhje me misionin e saj.*

Neni 13

Neni 22 shfuqizohet.

Neni 14

Në nenin 28, pika “5”, ndryshon si më poshtë:

“Punonjësi i Agjencisë së Inteligjencës dhe Sigurisë së Mbrojtjes i nënshtrohet procesit të arsimimit, trajnimit dhe kualifikimit në institucionet arsimore ushtarake dhe civile brenda dhe jashtë vendit”.

Neni 15

Në nenin 29 pika “2” dhe “3”, ndryshojnë si më poshtë:

2. Funksion të nivelit të lartë drejtues janë:

- a) Drejtor i Përgjithshëm i Agjencisë së Inteligjencës dhe Sigurisë së Mbrojtjes.
- b) Zëvendësdrejtor i Përgjithshëm.

3. Funksion i nivelit të mesëm drejtues është drejtor drejtorie.

Neni 16

1. Në nenin 30, pika “1”, shkronja “h”, shfuqizohet togfjalëshi:

“që kanë objekt të veprimtarisë së tyre çështje të sigurisë ose të mbrojtjes”.

2. Në nenin 30, pika “4” togfjalëshi “Kriteret për plotësimin e kushtit të sigurisë” ndryshon si më poshtë:

“Kriteret dhe procedurat për plotësimin e kushtit të sigurisë”.

Neni 17

Në nenin 31, pika “3”, ndryshon si më poshtë:

“Shpallja e vendit të lirë të punës bëhet nga Agjencia e Inteligjencës dhe Sigurisë së Mbrojtjes në faqen zyrtare të Ministrisë së Mbrojtjes, të paktën, 30 ditë para datës së caktuar për konkurrim”.

Neni 18

Në nenin 32, në pikën “2”, pas shkronjës “b” shtohet shkronja “c” me përmbajtje si më poshtë:

“ c) çdo formë tjetër të përshtatshme të verifikimit të aftësive”.

Neni 19

Në nenin 33, në pikën “1” dhe në pikën “2” togfjalëshi “Punonjësi, ushtarak dhe civil” ndryshon si më poshtë:

“Kandidati”.

Në nenin 33, në pikën “1”, fjalia “Gjithashtu, gjatë kësaj periudhe punonjësi duhet të kryejë kursin bazë në qendrën e trajnimit të Agjencisë së Inteligjencës dhe Sigurisë së Mbrojtjes” ndryshon si më poshtë:

“Gjatë kësaj periudhe punonjësi duhet të kryejë trajnim familjarizues me objekt njohjen me procedurat e punës në AISM”.

Neni 20

Neni 34 ndryshon si më poshtë:

Emërimi, lirimi ose shkarkimi nga detyra i punonjësit

- 1. Emërimi, lirimi ose shkarkimi nga detyra i punonjësit ushtarak oficer ose i punonjësit civil ekuivalent me të, sipas tabelës së organizimit dhe pajisjeve, bëhet nga ministri i Mbrojtjes, me propozim të drejtorit të Përgjithshëm të Agjencisë së Inteligjencës dhe Sigurisë së Mbrojtjes.*
- 2. Emërimi, lirimi ose shkarkimi nga detyra i punonjësit ushtarak nënoficer, ushtar, ose i punonjësit civil ekuivalent me ta, sipas tabelës së organizimit dhe pajisjeve, bëhet nga drejtori i Përgjithshëm i Agjencisë së Inteligjencës dhe Sigurisë së Mbrojtjes.*
- 3. Punonjësi i Agjencisë së Inteligjencës dhe Sigurisë së Mbrojtjes lirohet nga detyra në rastet kur:*
 - a) jep dorëheqjen.*
 - b) mbush moshën për pension të plotë pleqërie.*
 - c) bëhet i paafte përgjithmonë për kryerjen e detyrave, për shkak të kushteve shëndetësore.*
 - ç) nuk mund të ushtrojë detyrën për një periudhë kohore më të gjatë se 6 muaj për pamundësi fizike dhe shëndetësore.*
 - d) ka ristrukturim ose shkurtim funksioni organik.*
 - dh) vlerësohet dy herë rresht “jo mjaftueshëm”.*
 - e) nuk pranon të emërohet në një detyrë tjetër.*
 - ë) përfundon kontratën e punës.*
 - f) ka konflikt interesi me detyrën që kryen.*
 - g) nuk pajiset ose i hiqet “certifikata e sigurisë”.*
- 4. Punonjësi i Agjencisë së Inteligjencës dhe Sigurisë së Mbrojtjes shkarkohet nga detyra në rastet kur:*
 - a) dënohet me vendim gjyqësor të formës së prerë.*
 - b) për shkelje të rënda disiplinore.*
 - c) për akte e sjellje që diskreditojnë rëndë pozitën dhe figurën e tij dhe të institucionit.*
- 5. Punonjësi ushtarak i Agjencisë së Inteligjencës dhe Sigurisë së Mbrojtjes nxirret në rezervë apo lirim nga shërbimi ushtarak, sipas legjislacionit në fuqi për gradat dhe karrierën ushtarake në Forcat e Armatosura të Republikës së Shqipërisë.*
- 6. Punonjësi i Agjencisë së Inteligjencës dhe Sigurisë së Mbrojtjes, në momentin që lirohet ose shkarkohet nga detyra, dorëzon menjëherë detyrën.*

Neni 21

Neni 40 shfuqizohet.

Neni 22

Në nenin 37, pika “3”, bëhen ndryshimet si më poshtë:

Pika “a” ndryshon si më poshtë:

- a) *“jo më pak se 5 vjet në pozicion punonjës në funksion ekzekutues”.*

Pika “c” ndryshon si më poshtë:

- b) *“jo më pak se 5 vjet në pozicion drejtues i nivelit të mesëm”.*

Neni 23

Në nenin 48, titulli i nenit ndryshon si më poshtë:

“Kufizimi i lirisë së lëvizjes dhe për veprimtari të dyta”

Në nenin 48, pas pikës “2” shtohet pika “3” me përmbajtje si më poshtë:

“3. Punonjësi i Agjencisë së Inteligjencës dhe Sigurisë së Mbrojtjes nuk mund të punësohet ose të kryejë veprimtari tjetër private pa marrë më parë miratimin me shkrim të drejtorit të Përgjithshëm të Agjencisë”.

Neni 24

Në nenin 49, pas pikës “3” shtohet pika “4 me përmbajtje si më poshtë:

“4. Punonjësit civil të Agjencisë së Inteligjencës dhe Sigurisë së Mbrojtjes, në rastin e dërgimit me studime nga institucioni, trajtohet me pagë si punonjësit ushtarakë të kësaj agjencie”.

Neni 25

Në nenin 51, pika “2”, ndryshon si më poshtë:

“Për nevoja të punës dhe interesa të shërbimit, orari dhe koha e punës mund të ndryshohet me urdhër të drejtorit të Përgjithshëm të Agjencisë së Inteligjencës dhe Sigurisë së Mbrojtjes ose të eprorit të punonjësit. Në rast të kohëzgjatjes së kohës së punës, punonjësi i Agjencisë së Inteligjencës dhe Sigurisë së Mbrojtjes kompensohet sipas legjislacionit në fuqi”.

Neni 26

Në nenin 54, pika “2”, togfjalëshi *“në masën e gjysmës së pagës mujore”* ndryshohen si më poshtë

“në masën e një pagë mujore”.

Neni 27

Neni 59 ndryshon si më poshtë:

1. *Për personelin ushtarak të Agjencisë së Inteligjencës dhe Sigurisë së Mbrojtjes zbatohet legjislacioni në fuqi për disiplinën ushtarake në Forcat e Armatosura të Republikës së Shqipërisë.*
2. *Për personelin civil të Agjencisë së Inteligjencës dhe Sigurisë së Mbrojtjes, ministri i Mbrojtjes, me propozimin e drejtorit të Përgjithshëm të Agjencisë së Inteligjencës dhe Sigurisë së Mbrojtjes, miraton rregulloren e disiplinës, kërkesat e së cilës janë të detyrueshme për zbatim.*
3. *Masat disiplinore për punonjësin civil jepen kur veprimet dhe mosveprimet e tij nuk përbëjnë vepër penale.*

Neni 28

Në nenin 61, pika 2 ndryshon si më poshtë:

“Mënyra e raportimit të shkeljes disiplinore dhe procedurat për ngritjen dhe funksionimin e komisionit disiplinor përcaktohen në rregulloren e disiplinës. Pas propozimit të komisionit disiplinor, ministri i Mbrojtjes ose drejtori i Përgjithshëm i Agjencisë së Inteligjencës dhe Sigurisë së Mbrojtjes, vendos dhënien, mosdhënien ose ndryshimin e masës”.

Në nenin 61, në pikën “3” shtohet përmbajtja si më poshtë vijon:

- a) *“Masa disiplinore për shkronjën a dhe b të nenit 60, jepet nga drejtori i Përgjithshëm i AISM”.*
- b) *“Masat disiplinore për shkronjën c dhe ç të nenit 60, jepen nga autoriteti i cili ka emëruar personelin në detyrë”.*

Neni 29

Në nenin 66, shkronja “c”, bëhen shtesat si më poshtë:

- a) Ministri i Mbrojtjes, në zbatim të neneve 10, pika 5; 16, pika 2 dhe 27 pika 2, të këtij ligji.

Neni 30

Ky ligj hyn në fuqi 15 ditë pas botimit në Fletoren Zyrtare.

Miratuar në datën __. __. 2023.

KRYETARI

Lindita NIKOLLA